

縵雅堂駢體文

二



文體駢堂雅漫

(二)

著壽詒王

編主五雲王

編初成集書叢

文體駢堂雅縵
冊二

中華民國二十五年十二月初版

章

著者 王 詒 壽

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

縵雅堂駢體文卷五

報孫彥清書

首春得惠書。人事淩雜。久缺不報。臯臯勞燕東西。川陸修阻。思而不見。亦既勞止。足下驅車冀野。解轡大梁。尋兔苑之往基。溯孝王之故事。其亦思浩歌衛風。高詠周雅。延鄒生召枚叟之風。而慨然歎不與古人同時乎。汝州假榻。縱游嵩岳。訪少室之仙迹。陟黃蓋之高峯。吐納煙靄。呼吸青蒼。鸞歛鳳吟。天風振蕩。又何其豪也。春官報罷。小住都門。以君通悅。得失何系。惟自儻從北行。嚴燠屢易。閨中有刀環之盼。孺子值宜教之時。雖鵝鶴未招。亦當一脂歸轡耳。僕自從事書局。于今三年矣。老蠹三生。不飽神仙之字。秋兔一束。仍同吳市之簫。比者楊大中丞復采及微薄。屬總校事。竊念校讎之學。匪云小道。對勘狀其精嚴。埽塵喻其難盡。訂隻文之異。無證則誣。存本來之真。闕疑亦貴。而世有淺人。昧于古義。不識壺盧之本。勇于妄改。亂點金銀之車。逞其率臆。輒成笑柄。用以競競。不敢少忽。秋深夜寒。江館漏永。同志三五。鐙火參差。相與考證異同。補拾錯墜。往往寺鐘欲動。黃墨未已。蓋亦藉以增求古之識。破羣言之惑。心乎樂之。不爲勞也。上冬之杪。爰理歸櫟。小集娛萱之圃。止宿鷗水之堂。勉鉏秋戰新捷。意與自勝。幼眉高才被落。兼抱騎省之戚。邕闕無歡容。然讀其近所爲詩。益進于婉篤。而無浮響。倘所爲窮而後工者邪。歲云莫矣。風雪閉門。聊貢所懷。不盡翹結。

寫觀世音經告文

粵自華蓋雲香。金塔啓青鴛之刹。銀旛花擁。玉宮繙靈鷲之文。輝寶月於蓮臺。雀離閱其教。暢宗風於榆櫨。龍樹衍其源。緬惟慧照。咸導法航。式輸贊唄之誠。尤被慈悲之力。伏惟濟世上尊。能仁大士。顯化在妙莊之國。留迹于落伽之山。紫竹成林。卽是貝多之樹。玉餅插柳。便成摩歌之花。黿頭示象。安法界于閻浮。龍女皈眞。扇宏風于巨海。宣五光而普渡。運千手以拯人。但伸呪願。卽種因緣。能誦眞言。何羈感應。故昔者虎牢戰苦。白馬飛來。象突山高。金師震吼。徹奇輝于水底。風雨谿寒。消猛火于林中。弓刀路隔。中流禪舫。神颺吹如鳥之帆。午夜香鐙。法雨照飛狐之路。亦有星沈貫索。白獸開尊。雪斷歐刀。青螺示寢。益陽獄急。幻素羽于鶴屏。南宮身危。迴兇鋒于狴廝。千徧致金雞之放。五道開鐵犴之門。加以離狐魂返。透珠汗于緇衫。紫鼠丹成。滴玉涎于翠竹。銀盆湔腑。勝龍宮之禁方。鐵鑊煉魔。問蛇神其安往。凡是沈災之拔。竝由持念之誠。略陳往事。足證珠林說法之編。若數宏慈。非徒金剛鳩異之作。至若銀橋老母。妙女持幢。金坐比邱。閻摩合掌。雖迹鄰於縹緲。要理推乎固然。故冥福之有資。亦史傳所附見。詒壽五濁凡根。六尺塵質。曾參妙諦。誦匪代以孝經。謬附文人。業敢矜乎夙慧。永懷罔極。追念慈幃。銅墨素尊。旣愧子懋之花。寶鏡彤爐。復慚敬宣之佛。用裁青簡。別滌冰甌。鵲尾難靈檀之香。犀液調金泥之粉。敬寫觀世音經一通。伏願春迴幽室。露灑宵途。餅浮五彩。見普照之光華。雲涌千蓮。示菩提而接引。倘比瓊宮璇室。摩耶登忉利之天。敢忘紫磬紺魚。木患轉婆羅之號。

送譚仲儀之皖序

歲在焉逢閏茂仲冬之月。譚子將以縣令試于皖。儼裝貞吉。艤棹待行。時則江梅垂發。煙遽弄寒。夕陽滿衣。吳舫如屋。送者既集。祖席斯敞。其友山陰王詒壽。乃起屬之酒曰。行矣。譚君。勉旃。自愛。行將綰銅章。佩黃綬。振絃歌之響。爲民社之官矣。以君通才。何愧良令。竊衡簪海。蒙有感焉。夫萬戶作長。百里典城。焚劇仰承。黎元縣命。故昔者東里設操刀之喻。元明深飲酒之戒。凡以重其任也。自軒蓋日盛。清濁遂淆。但豔厥官。遑計乃職。稽其習尙。可得而言。本謝學之素優。又蔑文之無害。階緣時會。獵取一官。將以籌白檀之餉。漁奪是其本懷。將以償紫纈之輸。興生問其孰利。餓豺之喙一尺。黠狐之幻百方。丹魄紫裘。服翫侈其珍麗。季蛇叔虎。僚友較乎瘠肥。是謂沓墨。其大較也。以賊深博燭姦之名。以苛暴爲濟貪之具。笞榜百楚。儼鼓吹之悅聽。呼暴滿堂。置是非于不問。凝血棒赤。斷骨枷青。善族碎于毆猾。而豪強不敢擊。愚眈畏若踞蝮。而盜賊益以橫。是謂毒螫。其尤甚也。性本恂慙。習爲愉綆。非士元之驥足。效子猷之馬曹。亦管判事。棲屋腐豪。黃被放衙。午鼓沈夢。知慧蔽于變季。教令傳之胥奴。目眩黃白之局。何心乎亭疑。體被金毳之華。有同乎土偶。是謂韞蠹。乃其次也。若此者。大府壅而不聞。同列不以爲賊。其有一二自好之士。清靜之吏。則且非笑之。詬病之。目爲崑愚。標之異黨。嗟乎。嗟乎。所謂導揚惠字。古循吏之風。其尙可問哉。譚君高字邃器。淑質朗抱。甄明經學。發揮文章。不以之振龍藻于螭頭。侍清問于豹尾。乃降心抑首。俛仰其中。雖曰猿投有林。得無鸞枳致慨乎。然僕之意。則有進也者。夫置美程于叢确。不能蝕其光者。其質純也。伍衆

草于瑤芝。久亦染其烈者。其感漸也。君抱其所學。策名王途。白壁見賞。赤符卽下。識辛昂之達。俾行成都。知卜式之能。便除緱氏。庶幾以儒術潤吏治。以文雅道禮化。樹居職之表。作鄰城之宗。或能使顯虐感其惠風。闢葺聞而興起。佳乎吏也。不其盛與。且皖。蒙舊游地也。形勝之國。冠斗襟江。爲魁偉之所棲。多名賢之故治。閒嘗詢父老。讀銘碣。如獨孤賜魚。孟宗封鮒。涪翁以篇什顯。游酢以理學傳。翟公黃父之清風。西谿樅陽之惠澤。竝有遺蹤之可指。非徒志乘之僅存。君驅車上下。當亦流連往徼。遐思芳軌。而喟然以慨乎。三爵告盡。棹歌已發行矣。譚君勉旃。自愛。爲吾鄒光。爲黔赤福。江水千里。待君好音。

帶經堂記

夫棲心龍祕之府。驚精虎觀之奧。而不辨稊芒。不知鐫鏤。田荒柰何。墮身赤犢之策。揣志丹扈之藏。而不親筠素。不識墳索。學荒柰何。揚子雲有言。古之學者。耕且養三年。而通一經。明耕讀之未嘗偏廢也。吾友定海黃君元同。海岱清士。東南通儒。樊重善稼。著世門于南陽。曹褒定禮。傳家學于慶氏。有田一頃。擁書百城。養沖情于素風。衷羣言于先聖。嗣君善學。早著鬢籍。既同玄尚。克承青箱。爰于甲戌之冬。除舍北之隙地。構谿南之草堂。闢綠杉以爲扉。種丹荔以網壁。徑僻迴俗。窗虛向陽。不崇雕華。取適枕肅。君顧而樂之。乃取漢兒寬事。顏之曰帶經。明所志也。爾其煜煜丹實。蓂果林于面軒。濛濛翠雪。展茗旂于傍砌。蘭雨低檻。橙陰覆檐。繡野錯乎東西。流泉縈其左右。其中則有藜閣珍校。瓠中舊編。縹帙雲排。松籤鱗次。琳琳乎琅琅乎。古文奇字。兼收漆簡之蟲。瓊葉靈芸。曾無羽陵之蠹。乃薰鑪香。卻塵軌。餐典籍之芳潤。尋道術。

之橐龠。鳩雨澤土。燕颺暖人。時挾青編。言涉華畝。載耕載誦。斯樂斯陶。香來餅餌。聲出金石。林鷺爲之息羽。田鶴爲之引吭。亦羲皇之風矣。抑又聞之。通經之用。非徒淑身利居之貞。豈必遺世。它日者持其所尙。設施王途。則將崇詩書。教稼穡。使爲學之士。明繡鞶之非珍。執業之子。知播琴之毋惰。是又足以踵儒雅于漢京。媲宏風于千乘者也。杭州朱西泉。以經苑之宿彥。通畫學之六法。于君爲同歲生。堂旣落成。因屬之爲圖。而余爲之記。

送何竟山之官建州序

離離津樹。春風始來。芊芊芳草。暮色千里。何子于是策青駒。發蓬驛。泝穀渚。踰霞關。以達乎建州。試其郡丞之官。方祖筵之旣張。咸贈言于臨別。有客慨然中坐而起。謂余曰。何子以揆摛之彥。投足簿領之中。非策之善也。吾爲惜之。余曰不然。士有儷俊青翮。擷秀丹穎。汨心油素之困。騰藻龍魚之肆。折翅屢遭。鼓氣彌勍。往往素絲被領。青雲無路。枕息乎繩纆之內。資生于句讀之師。翻然而悔。亦云晚矣。何子懷抱利器。不及其壯而思變。將使執蠹帙以老乎。且扇皇途之鴻風。亦何必由春官之墨榜也。客又曰。何子嘗守廣文之官矣。真除可期。儒官非賤。今之改弦。吾又慮其迷轍也。余曰。是又不然。夫昔者陳思作頌。表矩範于學官。鄧禹論才。可問學于博士。固知郡國之師。卽爲治化之本。自後世以道術爲拘迂。遂置師儒于不問。而居其職者。亦復冥恣自甘。萎腰不恥。騎疲驢于官舍。攬元雁于皋比。青袍弟子。視等草萊。黃綬同官。資爲嘲弄。成仕宦之末境。乃壯夫所不爲。何子是行也。譬之叢臺寶珠。所在見貴。青萍神鐵。發匣騰光。槃槃

之才。其甘以寂寂終乎。客又進曰。然則何子曷不爲專城典牧之官。而爲秉簡佐岳之吏也。曷不至南都名勝之區。而至東海卑溼之地也。余曰。是說也。又所謂知一而不知二者也。龐士元之展驥。當在治中。盧渭州之佩魚。乃由從事。半刺之任。五馬同符。況蠻疆要阨。東州奧區。海上之烽初銷。番夷之情叵測。赤旗化驚。白馬展猷。亦功名之會矣。且夫鸞孔振翼。不入赤霄之羣。金匏合肆。始播降神之奏。今越中雄俊君子。如周季貺。傅節子。諸君。皆以郡丞官閫。何子以榆里之好。簪海同趨。則將朱轡互引。宏此紱佩之規。龍藻相輝。非直殷勤之雅。是更非君所及知也。客意乃解。引滿而起。余遂詮次問答之言。以贈何子之行云。

與陳藍洲書

八月一日在越。得徐紀報云。儻從須松谿回始發。計當在二十後耳。初十日到會城。思得展西窗之談。握河梁之手。而足下已于前二日行矣。水雲蒼蒼。瞻望弗及。願言之懷。良用悵然。義璘迅速。晦朔又周。伏惟颿程多泰。軌途早抵。漢江青山。聳若侯吏。武昌官柳。秋來迎人。棲琴旣安。柱版伊始。足下以經術之彥。負明通之才。明月夜光。見者知寶。猶憶前歲之秋。足下與僕及均父抵掌江樓。各據所抱。因言它日者。或出領民社。設施何先。僕以拙疏。甘謝不敏。均父雄氣雲翔。壯詞濤涌。謂當使豪強糜于赤棒。猾胥懾其火符。意啓法隨。威行郡國。而足下獨謂悃悃無華。漢后良矩。吾有民社。請事斯語。其時涼月在簾。江湖正怒。拔劍起舞。撫掌大哈。迴首前塵。如昨日事。足下今且領震雷之封。試製錦之手。當酬曩言。流慶蒼赤。獨念均父。南池垂翅。西陲仗劍。一官未成。萬里孤往。玉關信阻。元律告寒。青袍疲馬。稅駕何所。輒爲嗟結。不復能

置僕局迹緹素。顧影寡儔。自君之行。松老旋返。離抱未暢。青驪載駁。仲子比日歸來。皖中之行。當亦不遠。無多良友。忽復分散。湛湛江水。極目千里。皎皎明月。懷人各方。此其所感。又何可言。楚北襟江帶河。形勝之地。罷參散帶。常展雄覽。其地風習如何。鄉縣既殊。服食自別。伏希起居珍衛不宣。

答施均父書

均父足下。河梁攜手。曾賦五言。耀靈振轡。條彌一載。秋閒松谿歸。述足下拂衣出都。萬里西邁。保陽遭負。匱之盜。太行墜再蹶之馬。毅然長征。不復返顧。豪邁之氣。聞之神王。旣念孤蹤關塞。冒犯霜露。登樓引領。復用悵結。歲聿云暮。始得十月十日。皋蘭書。發函伸紙。迴環三復。鋒振詞舉。有同抵掌。夫豐城劍氣。待茂先而始騰。雒陽玉檢。遇子伯而增寶。足下之見器于相國宜也。足下習虎鈴之經。抱龍驤之志。以枕戈之越石。依當代之夷吾。誠神蛟得雷雨。駿足步風雲之時。虎牙建節。燕領封侯。烈士壯猶。固無多讓。然必謂功名當如班超。陳湯。而以一郡一邑爲未屑。僕竊以謂過矣。夫守郡者股肱之任。臨邑者政化之基。宣帝有言。惟良二千石共治。漢官之制。掌一萬戶上爲令。興剔仰施。黎元繫命。故古者郡邑良吏。類有公輔之器。將帥之資。或亦九變起。黑山寇來。則且提枹展旂。揚武定甌。其蕤纘丹常。熠氏青簡者。蓋比比也。僕願足下韜鉞櫜彩。和光葆貞。循資以求。隨分而處。勿舍夷途而趨險軌。勿棄近績而夸遠功。此則萬里故人。所殷殷進規者耳。數月以來。松谿赴江右。藍洲赴荆門。仲修赴皖南。竝以長才。聘于王路。僕冷螢無燄。老蠹同餐。側身四顧。彌悵寥落。良朋星散。薄俗雲浮。如何如何。海濱騷動。幸已銷烽。天台之變。乃由征賦。弄

濱池之兵。無非赤子。聚南山之盜。尙是白徒。誠得賢長官善處之。當無慮耳。朔風凜然。聽園梅開。巡檐孤嘯。懷我知己。邊地苦寒。雪厚幾許。伏冀眠餐。倍萬珍重。

歷朝詩錄自序

粵自瑤練衍朱琴之譜。網罟興歌。瓊絃流素瑟之聲。豐年繼詠。雕齒應參之帝。傳咸黑之奧文。蜺精貫月之朝。攄叢雲之浩奏。拜靈霧于韻座。松棟留音。仰卿瑞於紆雲。薰琴播美。襄陵逸唱。實媿盛于廣揚。晨露清詞。乃先軌乎比興。以及素王之所訂。湘纍之所吟。八風肇律。七鬯宣和。至晉所流。復乎莫尙矣。若乃赤炎統序。黃靈膺圖。蘇李振其先聲。曹劉展其駿步。承源乎騷雅。揚蕤乎琳琅。典午開清新之途。南都尙緝麗之製。藻彥鱗襲。雕章鳳鵠。至夫有唐。是際極盛。麟德之世。四傑擅其勝。大歷而後。十子爲之宗。掣青鯨于碧海。既拓盛朝之觀。縈落花于迴風。亦標晚紀之致。逮乎宋金之作。元明之篇。洵風雅之代興。有才人之踵起。雖其體或殊。夫洪纖而發言。咸係乎時會。要皆抒自得之精蘊。成一代之風氣。而論者好爲高語。謂體必尊漢京。誦勿踰盛唐。比齊梁于皇琴。斥季近爲紫色。吁。何其慎也。夫詩言性情。百代同軌。溯其所自。可得而言。彼夫金門妙彥。玉苑儒臣。柏梁繼音。龍池應制。廣頌之體。麗則同歸。若乃落日弔古。結渺思于煙雲。碧山棲沖。寄高情于泉石。亦有楓林江水。良朋遠去之時。草色天涯。客子思家之日。志士失路。投足無門。孤憤鬱懷。問天不語。莫不發孤唱。起慨歌。託閨襜之宣幽。協宮徵以寫蘊。故人代所隔。雖有遐邇之分。天機所流。必無異同之致。出乎真性。卽成雅音。苟旨趣之無乖。自矩矱之有在。何必規規焉過爲區區。

別哉。僕愧非揆擢之才。略識詠吟之旨。蛩號自惜。獮祭甘譏。爰卽夙習之舊編。爲別錄于暇日。掇其珠玉。不爲主客之圖。翦其蕭糧。蔑因時代而泥。不名一體。轉益多師。用作敝帚之珍。敢曰騷林之表。嗟乎。一士之生。百年如寄。上之欲明廷高議。定縣叢之儀。次亦當祕閣陳書。繼青藜之業。乃徒沾沾於雕蟲之末。矜窺豹之論。亦可慨也夫。

春游湖上小記

甲戌三月之二十日。林雨乍過。新綠媚人。輕風不寒。薄陰垂水。乃呼吟牖。約獻侶。白拾三四。蘭槳一雙。言從涌金之郭。汎乎明聖之湖。于是緣修隄。溯枉渚。穿平橋。指幽麓。激波穀展。鷗路入花。古藍雲藏。魚唄越竹。羈榜繫樹。潑薜碧甌。長髯挈壺。老曇迎客。攜鑽籬之珍菜。烹水梭之小鮮。舉酒促棹。放乎中流。魚鳥寫其娟妍。煙波樂其清曠。南高北高。遙接雲氣。裏湖外湖。淡隔柳景。色秀餐可。綠淨唾難。余乃岸幘四顧。破舷而歌。歌曰。水如掌兮山如眉。方仙舟兮澹忘歸。春欲暮兮花亂飛。君不飲兮何爲。客和之曰。水如鏡兮山如螺。燕燕舞兮鸞鷖歌。勸君飲盡金叵羅。佳辰良會苦不多。清韻道然。林壑衆應。白雲依依。夕陽欲墮。返羽拂水。暝色漸合。迴舟遵岸。乘風詠歸。夫冰幃繡檻。泊藤陰之伎船。金絲玉簫。流花底之珠唱。往昔歡游。非無綺集。然而悅魂于歌舞。則曠逸之趣不專。綴目于釵黛。則崢泓之觀或蔽。故竹肉之締節。不若山水之清音也。朱翻之錯列。不若鷗鷺之相親也。刷一葦其可杭。忻良儔之共載。飄飄然作天地閒想。汎汎乎分水中之鳧。于胥樂兮。何以加茲。因泚筆記之。以志一時雅趣云。

秋舫填詞圖自序

余自庚午歲以撫軍楊石泉中丞之辟校經虎林去家不遙閒日可達每值秋霽輕裝往來自解西陵之纜至于北郭之廬江程紆回水木明瑟烏篷八尺坐臥雜以酒餅青山一窗煙雲供其畫本興之所至輒譜小詞觸盼流聲不假錘琢用以酬清景寫渺襟也于時江籬送香汀樹未脫清陰垂野輕寒流衣蓼雨一尺夕陽乍晴蘋風半灣涼色在水亦有蓮女單櫂菱娃疊舸低徊江南之唱宛轉西洲之曲及乎清霜戒冷白雲不飛肥菰蘸波野雁忽下殘荷掩寺一僧獨歸菊離離其綴芳蘆蕭蕭以答獻暝煙墮樹皎魄出林禿柳橋欹晚漁發其清唱黃葉邨小遙鎗生夫水光莫不引白石之幽情入賡洲之簫譜夫昔者端已扁舟沮棹乎章水甫里高致恣情於茗谿良以途危則跬步比之靈關程夷則浩蕩等之衽席猶憶辛酉之秋狂寇滔天吳越陸沈閒關避地扁舟西下同此百數十里間青烽照乎碧波斷骸橫于高岸腥風如虎瘦日不輝狐鳴狼跑耳礪目棘谿葉偶卷疑邏騎之忽來林鴉四飛驚妖旂之突起江笛無語惟聞哀角之聲水花自紅卽是殘魂之血當此之時惴惴焉皇皇焉又安知有水鄉之可樂秋色之足賞哉今者廢甌早滿江戍無警儻何乎浦溆揚擊乎中流魚鳥親人江湖有味高歌水調和以鉞絃之聲散髮天風招彼吹笙之侶亦未始非吾生之厚幸也夫錢塘朱西泉孝廉讀余詞而好之爲作斯圖余遂自序其緣起云時甲戌仲冬日

病榻憶語一卷。會稽孫瘦梅觀察哭其女越畹女史而作也。芳蹤欲塵。秋淚不熱。殺青甫竟。來徵弁詞。僕也買鄰千萬。幸接清風。通徑十年。與共明月。其時青谿妹小。問字花簾。左家女嬌。待年羅屋。與女史問訊時通。過從勿閒。燃脂互寫。珍珠密字之牋。壁繭聯吟。金縷寶釵之句。紛茲內美。芳其彌章。繁言不聞。淑履可述。夫其珍同么鳳。慧兆翠雞。陶靖節之慰情。尙憐其弱。張安昌之愛女。頗甚于男。生長乎綺羅。出入乎保抱。縱使性成嬌惰。嗜在麗都。以論清閨。未云累德。而女史則蕙心獨幽。梅格不俗。五紋綵綫。時挑夜繡之鐙。百蝶羅袿。不結春游之伴。畫螺硯畔。每雜青編。吹絮簌中。兼藏古墨。誦南華秋水。身是綠衣之仙。錄北山移文。書奪金鑾之迹。翡翠之牀在手。珠玉之唾隨風。喜書早見乎九齡。熟簡已盈夫三尺。況乃晨妝埽月。修蘭笑以承顏。午課吟花。捧桃牋而繞膝。叢編代檢。雲葉早羅之廚。僻事能徵。錦舌青瑤之乘。由來淑女。不異佳兒。如此仙姿。合歸天上。雲冉冉其引。窈窕風飄飄兮吹衣。明星玉女。手白蓮以上征。青靈羽人。卓翠幢以早待。皆卷中本事墨蜚之境。匪幻。白鸞之召。旋來。溯其示疾之初。迄乎彌留之際。玉骨支瘦。不廢鳴蟬之梳。絲喘顛涼。尙戀秋蛭之字。觀察則水量磁斗。藥屑銀船。龍宮檢方。丹九還而莫合。雁鐙警夢。夕五起而猶驚。一雲曇花。半年病葉。五絲安續。雙淚空彈。蕭瑟珠櫳。永絕青絃之響。叢殘勸翰。忍開黃竹之箱。徒憶其零星倚枕之言。冀抒此夜雨虛帷之感。亦可悲矣。然而悲歡境也。修短命也。綵雲之聚散。何常。舜華之盛徂。隨化。況乎吟傳七字。綠楊鐙景之篇。決別一言。碧落天邊之約。俱本事容華著才媛之號。飛瓊返仙島之真。瑤海雖遙。珠輝宛在。嗶簫乍奏。恍睹乎桂旗。雕華勿湮。有同夫梓瑟。將見香函展碧。咸誦秋風。

綬雅堂駢體文 卷五

楚些之詞麗句敲金爭題明月湘君之什。

縵雅堂駢體文卷六

皋園修禊序

歲在困敦。粵上斯已。都轉秦澹如先生。乃約獻侶。攜芳尊。修禊于會城之皋園。地饒水石。亦美雲木。翡闌篆徑。縹泓鏡軒。本觴詠之勝區。有滄浪之舊館。于是芳莢一碧。游絲十丈。春陰在水。燕風散襟。展花棚于綺除。藏行廚于竹裏。軒蓋不雜。琴觚閒陳。招片紅以陪笑。香生酒鱗。嚶絲羽以答歌。清若笙吹。瑤情旣暢。玉山未頽。言飛羽觴。乃臨芳澗。苕帶量碧。葉葉乎春衫。蘋波濯纓。羅羅乎流水。孰客孰主。或喁或于。發裏古之幽情。振凌虛之遠歎。可謂標韻簪林。契沖物表者矣。夫浮生電謝。曦璘之騁不停。世事雲浮。滄桑之境倏變。況乎百年風日。佳時幾何。千里萍蓬。良覲不易。故昔者蘭亭繭紙。內史興陳迹之悲。涼苑雲輶。參軍有上日之記。莫不俛仰身世。流連勝集。發爲篇詠。傳之後來。先生以爲古人往矣。清濁可武。乃以落花芝蓋。楊柳春旂。流觴曲水。茂林修竹。分韻賦詩。而屬詒壽弁以序。雕瓊鏤采。無拘金谷之酒籌。簪水筌山。遂播芳園之韻事。會者凡十六人。

復見心齋詩集序

歲在丙寅。序屬首夏。詒壽于役暨陽。解裝邑署。杭州孫翔伯先生。名山選勝。謝公之屐方來。高館張鐙。陳蕃之關初下。先生儒林丈人。陳芳鴻彥。良德儷玉。寶行比金。篤詩禮之傳。趨鯉承訓。綏德門之慶。行馬早

施。故得棲養沖飮。婆娑風月。松石寫其高致。巖壑恣其清游。閑雲自舒。纖塵蔑置。僑谿南之詞老。爲地行之神仙。松格旣瞻。蘭味斯洽。呼之小友。訂以忘年。豈相與登紫閣之名岨。訪翠峯之遺構。尋浣紗之古石。弔苧蘿之荒祠。松翠十里。桐雪一尺。烏桕閒挈。赤藤謝攜。谿女笑指。疑爲羽霄之侶。山禽引吭。答此鸞歎之聲。討幽彌旬。得句盈軸。歸轡旋動。臨別惓然。于時兵火始熄。先生尙僑居甬東。湛湛江水。渺渺予懷。不見之恨。寫以三秋。加餐之書。動輒一束。無何。詒壽就官冷曹。屢理西渡之檝。先生亦返錢唐故居。王粲造中郎之門。倒屣常驚。乎一座。陸贄入張鎰之室。傾談或至于三日。秋風桂樹。則踴臂尋幽。微雪梅花。則竝履覓句。招孤山之老鶴。策段橋之蹇驢。無閒追隨。以永晨夕。嘗出其復見心齋詩全藁相示。靈弢獨解。天機自然。濯瑤蕤于秋泓。激涼吹于空碧。而先生唾可成珠。懷偏似竹。以炫服之俗嗜。居美瑤而勿珍。象陳賤子之芻言。用發主人之玫笑。夫蛇珠謝銀黃之飾。奇光自呈。螭鏡錫澄冰之輝。纖滓何綴。故尙素者不貴乎組綺。崇樸者不藉乎琢雕。今之襲金彩于士偶。澤膏斲于東家。爲麟之援。爲驪之爪。言乎騷雅。刷其反矣。先生獨能彈其古調。抒此性靈。良璧無瑕。澹詞彌雋。雖儲篇沮溺。莫悅睽盼。而白章姬解。何害大家哉。文字之契。丹雞可盟。官檄相催。青駒在戶。疊商致感。方吟杜陵之詩。龍蛇在歲。偏兆鄭公之戾。蓋自詒壽驅長山之車。先生已示維摩之疾矣。悲夫。元雲起而金芒掩。秋草碧而玉樹埋。重來門巷。傷心馬箠之撾。回首笑言。無復鹿牀之共。重泉永隔。十載于茲。屬者嗣公子授學士子。指學博。以詒壽素見知于先生。審其遺草。諉之訂編。自惟樸昧。何敢定先生之詩。顧念往日者。嘗與先生登臨江之樓。展夕陽之眺。感雲